

02 IANUARIE / 19 IULIE

**PARACLISUL
SF. CUVIOS
SERAFIM
DE LA SAROV**

PARACLISIERUL PE IANUARIE-RU

Канон молебный преподобному Серафиму Саровскому

Тропарь, глас 8

Мудрым девам уподобився, светильник душевный во всем житии соблюл еси неугасим, и яко пламенем огня, достойно имени еже ко Христу любвию, к небесному житию востекл еси, и по славнем успении твоём, пред лицом Владыки твоего, яко богосветлая свеща сияеши, иноком наставниче, Серафиме преподобне, испроси любвию чтущим тя, умное светозарение Святыя Троицы, мир и велию милость. **Дважды.**

Слава, и ныне. Богородичен. Иже нас ради рождееся от Девы, и распятие претерпев Благии, испровергии смертию смерть, и воскресение явль яко Бог, не презри ихже созда рукою Своею, яви человеколюбие Свое милостиве, прими рождышую Тя Богородицу молящуся за ны, и спаси, Спасе наш, люди согрешышиа.

Канон, глас 4

Песнь 1

Ирмос. Отверзу уста моя, и наполнятся Духа, и слово отрыгну Царице Матери, и явлюся светло торжествуя, и воспою радуясь Тоя чудеса.

Во свете пренебеснем парящими, отче, крилы, Божию лицу серафимски приближаяся, земных и плотных мудрованиии превышыши покажи, иже ты воспети дерзающих.

Образ был еси в человецех, ангельскаго воистину жития, во плоти сыи, на небесех дух свой имяше, отнюду же и возлюбленнаго си Христа, воцаритися в сердце твоём, восприяти сподобися.

За премногая откровения и чудныя благодати, Иисусовы язвы на теле смиренном ношаше, да преобразится сие подобно телу славы Его, иже смертью Своею смерть покаряющаго.

Слава. Любовь познал еси, юже превышнии Отец нам даде, возлюбленнаго ради Сына, и Троицы чадо явился еси неложное, Распятому за ны терпением даже до конца подражал еси, и светом Воскресения Его

присно наслаждаешься.

И ныне. Юже прежде сложения мира, в Невесту избра небесный Жених, и ангельский лик немолчными гласы поет, образ Твой пречистый, Марие, верный слугитель Твой паче видимых всех возлюби, ныне же лицом к лицу зрит Тя ясно.

Песнь 3

Ирмос. Твоя певцы, Богородице, живыи нетления источниче, лик Себе совокупльши духовен, утверди, и в божественней Ти славе, венцем славы сподоби.

Больши сея любви никтоже имать, да кто душу за други своя положит, ты же, отче, всенощными течением слезными, во всем иже на земли житии твоём, за спасение людское душу непрестанно полагаеши.

Льва рыкающаго весь мир поглотити, сего зубы сокрушил еси, на камени твердем Христове утвердився, сего ради победитель явился еси, и ныне ты молитвенно призывающих, противу лютых страстей укрепи.

Слава. Еже к Богу дерзновением твоим вооружаемы, на иже без правды гонящих нас мужески ополчаемся, Иисусово имя присно в сердцах имуще, Троице державней песнь трисвятую поюще, пение Бога нашего.

И ныне. Не умолчим еже славити Твоя величия, Марие Пречистая, на Тя все упование наше возлагаем, яко Мати явилася еси, Иже небесы и землею невместимаго, ангелом Царя и человеком Спасителя.

Седален, глас 8. От начала священнаго твоего жития, мудрости мирския и тленныя тщету презрел еси, Премудрость Божию ипостасную, паче пламене разжженною любовию возжелел еси, и Креста спасеное таинство, в непорочную душу свою восприим, того непобедимою силою укрепляем, равноангельному житию сподобися, и якоже другое солнце в мире просиял еси. Сего ради воспеваем твоя подвиги, чудоносне отче наш Серафиме, и верою вопием ти, моли Христа Бога, согрешением оставление даровати, чтущим пресветлую память твою.

Слава, и ныне. Богородичен. Многия щедроты Твоя, и неизреченное матернее Ти милосердие, коль краты небрежением преобидех, в лености мнозе жив, окаянныи, николиже поревновах, иже Христовых ученик житию. И из глубины обышедших мя смертоносных страстей взываю, простри руку помощи ми, Владычице, и молитвою Си, еже к Сыну и Богу Твоему, спаси мя, ненадежно погибающаго, Тя бо едину имам помощь и надежду, неключимый раб Твой.

Песнь 4

Ирмос. Седяи во славе, на престоле Божественнем, на облаце легце прииде Исус Пребожественныи, от Пречистыя Девы, и спасе вопиющия, слава Христе, силе Твоей.

Устне твои источник жизни покажутся, износяще святых Писании словеса, Божия хотения поведаяще. Ныне от уз мертвенныя плоти изшед, слышиши Премудрости глаголы неизреченныя, темже и от помрачения прелести спаси рабы своя.

Богу присно сердцем внимая, еже от века уготованное Его царствие, духовныма очима видел еси. Сего ради и от лукаваго

наносимыя ти скорби, и от ненаказанных человек озлобления, тебе яко стрелы младенец вменяхуся.

Слава. От младенства явлен был еси, яко сосуд избранныи, и до старости Богу работая, от силы в силу восходиши, возрастая премудростию же и добродетельми, на злобу мирскую евангельски младенствуя.

И ныне. Голубице пречистая и боголюбивая, междорамии златыми паче солнца блистаючи, Яже теплаго молитвенника Твоего, знаменьями и чудесы осияваеши, возсияй в сердцах наших богоразумия и чистоты зарю, и Свету невечернему сотвори причастники.

Песнь 5

Ирмос. Удивишася всяческая о божественней славе Твоей, Ты бо, браку неискусимая Девице, прият во утробе надо всеми сущаго Бога, и родила еси безлетнаго Сына, всем воспевающим Тя мир подавающа.

О дивному чудеси, паче слова и разума Пречистыя пришествию, Яже

возлюбленного Своего служителя, от одра смертного воздвиже, и апостол и мучениц лик ему, яко брату и другу ближнему, радостию беседоваху.

Мира сего честь и славу презрел еси, мирен дух стяжати возжелел еси, сего ради мир Божии, иже превыше всякого ума, соблюдаше сердце твое и разумения твоя, и добрая дела твоя, в человецех яко свет просветишася.

Слава. От рода добра, промыслом Вышняго Царя избранныи, яко многоценен камень, к венцу Небесныя Царицы возложися, в нем же предивною славою сияя, исцелении лучи болящим душам испущаеши.

И ныне. Церкви Божия преукрашенная, Еяже ради ангелом Непостижимыи, на земли яко человек явися, ныне церквам устави смущения, просвети душам недоумения, совестныя раны уврачуй, приводя во единомыслие люди Своя, яже Сын Твой стяжа, честною Си кровию.

Песнь 6

Ирмос. Божественное се и всечестное, совершающе празднество, богомудреннии,

Божия Матере, приидите, руками восплещем, от Нея Рождьшагося верою славяще.

Умным чиноначалиям, вышнему престолу предстоящим, духовными восхождении приближился еси, отче, разжженныя убо ради Христовы любви, серафимским именем достойно зовешися.

Павловы раны нося, борения терпя и подвизаяся, вся яже на земли яко уметы вменив, да Христа единого приобрящеши, темже и духом на небесная вознесся, и неизреченныя Божия доброты узрел еси.

Облечеса, яко избран Богови, свят и возлюблен, в милосердие и благостыню, кротость и смиренномудрие, ближняго яко Христа приемля любовь, воистину Владыце своему уподобися.

Слава. Едино просил еси на земли от Бога, еже жити во ограде святей Его, яко горлица гнездо обрете, олтари Господа сил, Царя небеснаго, в них же во гласе исповедания, непорочную жертву хвалы принося, духом веселяшеса.

И ныне. Ты едина еси избавление наше, Приснодевая чистая, о Тебе узы вражия

удобь разрушаются, и плененныя
свобождаются. Отжени от паствы Сына
Твоего душепагубныя волки, силою Креста и
молитв Твоих, Богомати Владычице.

Кондак, глас 8. Российской земли, во
единонадесятый час, пресветло восиявшая
звезда, молитвенниче теплыи о мире, и
скорбящим душам милостивное утешение,
свет и радость Христову низпосли в сердца
чад твоих, да песенно вопием ти: радуйся,
отче Серафиме, святым ангелом
собеседниче.

Икос

Ангельский глас, иже Пречистой Деве
реченный, от младенства прилежно в
сердце приим, от всесвятаго
пребезначальнаго Огня, светильник
душевный возжег еси, и Божественною
любовию разгараем, Крест Христов на рамо
возложил еси, в постех же и бдениих,
безплотных житию подражая, плоти своя
сосуд, обителище Духу Божию сотворил еси.
Сего ради явлению Небесныя Владычицы
сподобився, дарованием чудес по премногу

от Нея обогатился еси. И ныне Святей Троице предстоиши веселяся, и свет Ея неизреченный видиши, и купно со ангельскими лики, и с чинми преподобных, трисвятое пение возглашаеши, и о Христоименитых людех непрестанно Богу молишися. Тем же и наша смиренныя молитвы не презри, но прими, и яко благоуханныи фимиам вознеси, к недомыслимому горнему престолу, всех Владыки и Господа нашего. Да верно чтущии тя чада, во хвалении светло поем песнь богорадованную: радуйся, отче Серафиме, святым ангелом собеседниче.

Песнь 7

Ирмос. Не послужиша твари, богомудрении паче Зиждителя, но огненное прещение мужески поправше, радовахуся поюще, препетии Иже отцем Господь и Бог, благословен еси.

Дары Цареве своему принесе, веру чисту яко злато, надежду нетленну яко смирну, яко ливан возжег еси, юже на небеса возносящую любовь. Церковь явился еси одушевленна, и мирно приношение,

преподобен священник, и жертва Богу приятная.

Учениче имя от купели стяжал еси, иже Слову Божию возлюбленнаго наперсника, и сего словесем последуя, премудростию обогатился еси, яко за ближняго душу свою полагати, еже есть любви крестная и совершенная.

Слава. Яко от разбойник раны терпеливно подъял еси, яко о люте мучащих тя моляшеся, помози и мне, иже бесовскими прилоги, даже до отчаяния разбиену, душу мою избави, многими напастями вражиими, от путей святых низринуту.

И ныне. Свет от Света, Иже прежде век восиявыи, и в лета последняя на землю пришед, во Твою пречистую утробу вселися, негасимую Тя, Богородице, свещу показа, иже вся мирския концы, истинным богоразумием просвещающу.

Песнь 8

Ирмос. Отроки благочестивыя в пещи, Рожество Богородиче спасло есть. Тогда убо образуемо, ныне же действуемо, вселенную всю воздвиже пети, Господа воспевайте

дела, и превозносите Его во веки.

Явился еси в терноносная времена, яко крин прекрасен, смятенным сердцам мир Христов благоухал еси. Тако и на теле церковнем болезненныя раны, миром братолюбия уврачуй, да единеми усты и единем сердцем, Христа Бога нашего поем, и превозносим во веки.

Елико во тме страстей, и сени смертней сидящих, иже света животнаго никакоже видящих, и о сих руце к небесем воздевает, молитвенник огнедохновенный, иже свыше пламенем омертвелья души возжегая, и содружебники Богу сотворяя во веки.

Слава. Лучами добродетелей твоих, лед нечувствия в душах разваряеши, речными устремлении чудес твоих, церковь Божию веселиши, темже и неверствия и ересей свирепыя волны потопи, да Христа Бога поем и превозносим во веки.

И ныне. Едина еси, Марие, в дщерех земных порока не имущи, яко ряснами златыми, благодатию небесною преудобрена, сего ради славящих Тя, Богородицу, радости безсмертныя причастники сотвори, да в родех родов

воспеваем имя Твое, и превозносим во веки.

Песнь 9

Ирмос. Радуйся, Царице, матерем и девам славо, всяка бо dobroгласна благоглаголива уста мудрящаяся, не могут Тебе воспети достойно, недоумет же разум всяк Твоего Рожества разумети. Тем же Тя согласно славим.

Не убоимся, братие, яко смутишася языцы, царствия державная уклонишася, от гласов вод многих потрясется земля, но нетленнаго царствия упованием утвердимся, тебе последующе, отче, иже неложно любящии тя.

Ангельским чином совоспевая, с лики преподобных ныне, отче, согласно поеши, свят, свят, свят еси, Троице единоначальная, неподвижимое во веки царство, и держава еси непобедимая, иже православно верующим в Тя.

Слава. От псаломских удолии, и от апостольских садов, яко цветцы похваления, неискусною собранная рукою, приемли милостивно, отче, устен

младенческая немования, и яже от смиренна сердца въздыхания, и прости согрешышаго на небо и пред тобою, неключимаго раба твоего.

И ныне. Устами радости восхваляю Тя, рано в гуслах исповемся Ти, Иисусе Боже, Девыя Сыне, возшедый на небо пренебесное, и на земли чаемый со славою. Ты возвеличил еси в мире, иже премирныя Твоя любве рачителя, но и нас совершающих память его, помяни, Владыко, егда приидеши во царствии Твоем.

